

No tur edificio ta proteha y no por para un hende di benta su edificio abao

ORANJESTAD(AAN): Tin un preocupacion chikito, cual tabata leynan anticua cu dado momento, aunke e edificio ta protehi, toch e multa ta cheap. Yvonne Webb-Kock, como directora di Monumentenbureau, a splica cu monumentenbureau ta un departamento institui pa un decreto gubernamental y ta existi 21 aña y tin basta restauracion cu a haci caba y basta proyecto cu a guia. Tin mas di 50 miyon inverti desde existencia di e departamento pa rescata e edificionan historico. E no ta algo cu ta realisa cu un Gobierno y cu un minister. Tin departamento cu a traha cu varios minister, cual ta gradici tur di nan cu semper tur a duna apoyo na monumentenbureau. Ta contento tambe cu tur ta sigui kere cu mester haci algo pa proteha loke ta di nos. Monumentenbureau ta un departamento hopi chikito y ta trahando segun reglanan internacional. Ta sigui e reglanan tambe di Icomos y esey ta bisa exactamente kico ta e filosofia tras di restauracion. Leynan tey, e leynan ta data di 1991 y en berdad no tur edificio ta proteha y no tur ora por para un hende di benta e edificio abao. Si por haci algo ora cu e ta proteha y esey ta e fase cu a cuminsa cun'e, cu ta protehando. Si kier impone un ley riba comunidad, Gobierno mester ta e prome ehempel tambe. Esey tabata haciendo actualmente, cu e edificionan di Gobierno mester cumpli cu nan tambe, cu nan ta e ehempel pa e ora ey pueblo tambe sigui pa inverti den nan edificionan restaura. Ta haciendo hopi cos riba diferente tarea cu ta trahando. No ta trahando solamente riba drecha un edificio, pero ta trahando tambe riba proteha. Nan prome tarea di e departamento ta pa proteha nos edificionan. Hopi biaha hendenan no sa kico ta e reglanan of un doño di edificio ta bisa cu tin tanto regla estricto cu tin cu sigui y ta existi hopi, pero semper pa mehora e calidad y pa e edificio wordo rescata y pa e keda pa e siguiente generacionnan. A traha un buki cu yama Monumentenhandboek Aruba. A traha esaki hunto cu expertonan di Corsou, cu tin e mesun manera di construi, manera Aruba y pesey e escogencia a bay tambe pa traha esaki conhuntamente cu Corsou y a haya aprobacion tambe pa financia y pa haci proyecto aki. Minister di cultura a paga e expertonan di Corsou pa bin. A intercambia nan experticio.

